



Njia ya Kuufikia Wokovu

Yesu akamwambia, Mimi ndimi njia, na kweli, na uzima; mtu haji kwa Baba, ila kwa njia ya mimi.—Yohana 14:6.

Huzuni ilijaza mbingu, ilipofahamika kwamba mwanadamu amepotea... Ilikuwa ni lazima kwamba familia yote ya Adamu ife. Nilimwona mpendwa Yesu na kuona mwonekano wa huzuni na huruma usoni Mwake. Mara nikamwona akiikaribia nuru iliyong'aa kuliko kawaida iliyomzingira Baba. Malaika wangu akaniambia, "Bwana Yesu yumo kwenye mazungumzo ya kina na Baba Yake." Fadhaa ya malaika ilionekana kuwa nzito wakati Bwana Yesu alipokuwa akiwasiliana na Baba Yake. Mara tatu, alionekana kufunikwa na nuru yenye utukufu iliyomzingira Baba, na mara ile ya tatu alitoka kwa Baba, kuwepo Kwake kuliweza kuonekana. Uso Wake ulikuwa na utulivu, ukionekana kuwa huru kutoka kwa fadhaa zote na mashaka, na uling'aa kwa wema na upendo, kwa namna isiyoelezeka.

Kisha akawafahamisha jeshi la malaika kwamba njia ya kutokea ilikuwa imefanywa kwa ajili ya mwanadamu aliyepotea. Aliwaambia kwamba alikuwa akimsihi Baba Yake na akajitolea kutoa maisha Yake kama malipo ya ukombozi, kujitwika hukumu ya kifo Yeye Mwenyewe, ili kupitia Kwake mwanadamu apate msamaha; ili kupitia kwa stahiki za damu Yake na utii kwa sheria ya Mungu, wapate fadhila ya Mungu na hatimaye kuletwa kwenye bustani nzuri na kula matunda ya mti wa uzima.

Mwanzoni malaika hawakushangilia, kwani Kamanda wao hakuwaficha jambo lolote, bali aliwafunulia mpango wa wokovu. Bwana Yesu aliwaambia kwamba angesimama kati ya ghadhabu ya Baba Yake na mwanadamu mwenye hatia, kwamba angechukua hatia na bezo na wachache tu wangempokea Yeye kama Mwana wa Mungu. Karibu wote wangemchukia na kumkataa Yesu. Angeuacha utukufu wote mbinguni na kutokea duniani kama mwanadamu, akinyenyekeka kama mwanadamu, kupitia kwa nafsi Yake Mwenyewe uzoefu wa majaribu mbalimbali ambayo mwanadamu angeyapitia, ili apate kujua jinsi ya kuwasaidia wale wanaojaribiwa... Uzito wa dhambi za dunia yote ungewekwa juu Yake. Aliwaambia kwamba angekufa na kufufuka tena siku ya tatu, naye angepaa kwenda kwa Baba Yake ili kumfanyia upatanisho mwanadamu mkaidi, mwenye hatia (The Story of Redemption, 42, 43).

Utiifu kupitia kwa Yesu Kristo unampatia mwanadamu ukamilifu wa tabia na haki ya kuufikia mti wa uzima. Mazingira ya kushiriki tena matunda ya mti huo, yanaelezwa kwa uwazi kabisa kwenye ushuhuda wa Yesu Kristo kwa Yohana: "Heri wazifuao nguo zao, wawe na amri kuuendea huo mti wa uzima, na kuingia mjini kwa milango yake" (The S.D.A. Bible Commentary, Ellen G. White Comments 1:1086).